

«Sil Punct» persvada

■ (rtr) En sia ultima sesida è il cussegl dal public SRG.R (CP SRG.R) s'occupà tranter auter da l'emissiun da stad «Sil Punct» da la Televisiun Rumantscha. Medemamain è vegnidas observadas las reportaschas davart las pre-elecziuns en connex cun las elecziuns en ils Stadis Unids da l'America emessas al Radio Rumantsch. L'emissiun «Sil Punct» han ins pudì vesair dals 4 da fanadur 2016 enfin ils 19 d'avust 2016 mintgamai ils lavurdis da las 17.50 sin SRF1. Il nov format cumplettescha en ina fasa da pilot durant la pausa da stad l'emissiun «Telesguard». En cumparegliaziun cun il «Telesguard» èn las contribuziuns pli cumpactas ed il team da moderaziun è pli prominent durant l'emissiun. Il nov format persvada il CP SRG.R, è frestg, persunal ed infurmativ. Plaschì fig bain han il setting dal studio e la cumposiziun da las contribuziuns. La tschernha dals temas è stada attractiva durant tut il temp e quai malgrà ch'i n'è betg mo vegnì rapportà davart temas actuals dal di. Tuttina ha il CP SRG.R gù l'impressiun dad esser infurmà ed a medem temp strategnì. RTR ha fatg differentas adattaziuns dal fanadur 2016 enfin la fasa finala l'avust 2016 ed ha damai sviluppà vinavant l'emissiun. Questas meglieraziuns èn era stadas perceptiblas resp. vesavivlas per las aspectaturas ed ils aspectaturs. Il CP SRG.R constatescha ch'il project da pilot è reussì e giavischa ina cuntinuaziun da l'emissiun d'infurraziun «Sil Punct» la stad 2017.

Reportaschas davart las pre-elecziuns en ils Stadis Unids

RTR sa concentrescha durant las pre-elecziuns en ils Stadis Unids da l'America sin l'intermediaziun objectiva da resultats. Il CP SRG.R constatescha ch'èn per gronda part vegnidas emessas novitads al radio davart las elecziuns en ils Stadis Unids. Ina visualisaziun hai dà sulettamain en las emissiuns «Battaporta» e «Minisguard».

Da cumparegliar ils rapports dad RTR davart las elecziuns en ils Stadis Unids cun quels da las elecziuns parlamentaras federalas n'è betg adattà. A chaschun da las elecziuns federalas èsi vegnì rapportà a moda exemplarica sin tut ils vecturs (radio, tv, online). Las reportaschas rudimentaras cumprovan che RTR s'orientescha tenor eveniments regiunals e naziunals. Il CP SRG.R beneventa questa prioritaziun e na spetga dad RTR nagins rapports fundads pli extendids davart las elecziuns en ils Stadis Unids.

Tut ils cussegls dal public da la SRG SSR s'occupan da las reportaschas davart las pre-elecziuns en connex cun las elecziuns presidenzialas 2016 en ils Stadis Unids. La discussiun naziunala ed ina cumparegliaziun dals resultats da las observaziuns han lieu en il rom d'ina sesida naziunala l'october 2016 a Berna.

Il team da moderaziun da l'emissiun «Telesguard»

Il CP SRG.R ha observà la moderaziun da l'emissiun «Telesguard» enfin la pausa da stad. Il team da moderaziun survegn bunas notas. Las moderaturas d'enfin qua *Maria Victoria Haas* ed *Isabella Wieland* persvadan cun lur preschientscha ed ils dus novs moderaturs – *Annina Campbell* e *Livio Foffa* – dattan nov schlantsch a l'emissiun e s'integreschan a moda perfetga en il team existent.

Sguard en il futur

L'ultima sesida dal CP SRG.R en l'on current ha lieu il november. Il cussegl s'occupa dal schurnalissem mobil dad RTR che ha cuntanschì grazia als smartphones ina dimensiun dal tuttafatg nova. Medemamain observa il CP SRG.R las reportaschas dad RTR davart las elecziuns presidenzialas dals 8 da november 2016 en ils Stadis Unids ed ils dus live-streams dad RTR planisads per l'atun 2016.